

椒生隨筆

一函
四冊

椒生隨筆日錄

卷五

姜明叔論兵

謚法

諭兒輩詩

歸宗駁議

通家

常懷遠

黃堂

帝詩同揆

典史十得

掛印總兵官

百歲老人

官爵相

許乃吳其

信口成對

伯牙臺題壁詩

休甯縣芥亭聯

論部吏

西遊記

隆中武侯祠聯

騎兵

五女皆賢

咏雪美人

張叶簾賦句

內侍

腳色

陝甘近例

先勝

國朝畫家著名

集句詞

女狀元

卷六

俄人取伊犁城

論武漢

王子安善襲前人

糊塗粥

罄陽題壁詩

陰曹門聯

疏語沈痛

三元

傷亂詩

示逆靈兆

絕對

三聲

爲令入難

戴文節面奏語

北人好食蔥蒜

保甲

短掛戰裙

鬼教

選兵良法

少年科第

邑令宜爲循吏

黃太守

百歲壽母賜果圖

河套

鄧侍御疏略

帶肚

首山

八仙

司字平仄均用

顧亭林徵君

椒生隨筆卷五

清泉王之春譔

姜明叔論兵

姜明叔蕉簷曝背臆記中論兵十七條頗能卓有所見爰錄其七俾世之讀書而知兵者共欣賞也或問將曰三代之將其上伊呂其次方召皆聖賢之徒也春秋之將亦多儒者自戰國以下皆戰將矣惟漢之趙充國諸葛亮晉杜預唐李靖宋劉錡知書觀其用師亦異乎諸將矣有其責者宜何取法或問諸

葛武侯明申韓有諸。曰有之。爲將者必法孫吳。法孫吳必明申韓。明申韓必尙黃老。于武侯見之矣。噫。後世不能純乎三代之師者。以此。或問今天下一家。所慮者夷狄耳。彼旣不免侵軼。則將何以應之。曰。周伐玁狁。逐之盡境止焉。其伐荆蠻。亦曰威之。使服而已。此上策也。無奇功。無暴師。不以病民爲尙。後世得方叔。召虎。尹吉甫爲將。則中國可以久安長治矣。曰。衛霍何如。曰。當中國之方盛。值夷狄之始衰。制之無不得意也。一勞永逸之說。窮黷之飾辭耳。非三代聖

主之軌。

或問將曰漢之漢壽亭侯。曰義而正。宋鄂

國武穆王曰仁而正。唐李西平曰忠而不伐。後世之

將如三子者。亦可謂名將矣。惜乎達機則未也。孰見

機。留侯尉遲鄂國韓蘄王近之矣。自古帝王漢高

祖善將將。唐太祖善將兵。項羽曹操將也。百戰百勝。

故不能有天下。唐太宗臨危制變。料敵出奇。此借前

人之言而評魏武也。然帝王之知用兵者。莫如太宗。

以其習孫吳而知奇變也。魏武其匹乎。或問西漢

之臣善用兵者。曰莫如董公。惜其不爲高帝用。其次

則子房。其次陳平。平全用吳起權計。高帝之取天下。非三人之籌畫。莫之能一。韓信以下。皆戰將也。其識取天下之樞者。此三人焉。或問旌旂金鼓。曰。一軍之動靜。進退。全倚乎此。旌旂以萬人之目爲一人之視。金鼓以萬人之耳爲一人之聽。然不欲多。旌多則易亂。鼓多則易衰。在隨機應變。用之何如耳。

謚法

謚法以文正爲最優。本朝謚文正者六人。湯公斌。劉公統勳。朱公珪。曹公振鏞。杜公受田。曾公國藩。論

功勳惟曾爲最。如文恭文端亦謚之美者。得此謚者
恆多。文忠本不多見。近則謚文忠者凡數人。然惟林
公則徐。胡公林翼爲副其實耳。忠武二字亦優。楊公
遇春其矯矯者。軍興以來。又若習見不珍。而塔公齊
布。李公續賓。固不讓前賢也。靖節自淵明後罕覩之。
裕魯珊督部謙竟獲此謚。削而復予。他如文介一謚。
則僅浙杭馮小亭光祿培元一人而已。趙文雪門鉞
前有國朝謚法考一書。上歲彙集一部。添補不少。
頗屬詳備。

諭兒輩詩

明仁和訓導臨川聶大年壽卿諭兒輩詩云四兒五
歲六兒三莫與肥甘習口甜清白傳家無我媿詩書
世業要人擔兩餐淡飯何須酒一筯黃齏略用鹽聞
說有人曾餓死算來原不爲去聲官廉此詩予最喜之
可與陶公與子儼等書同誦

歸宗駁議

江南提督李朝斌本姓王氏襁褓中爲李氏父母撫
養鞠育至於成立王氏本生父母隔絕不相聞問事

隔四十三年。同治丁卯三月間。有善化人王正儒。赴江督曾侯處稟稱。李朝斌係所生季子。請復姓歸宗。侯相詢之李。則固茫然也。卽議駁爲告於朝。其疏語有云。查本朝言禮之書。尙書秦蕙田所纂五禮通考。最爲詳核。其於異姓爲後之事。反復辯論。一以原情爲主。所引金史張詩一事。詩本李氏子。育於張氏。閱三十年。始知之初。議歸宗。終以張氏無子。遂仍其舊。秦蕙田稱張詩爲孝。今王氏本生之父母。有子三人。而李氏撫養之父母。別無立後。正與張詩之事。

相類伏查定例出嗣之子歸宗亦以所繼父母有無子嗣爲斷。若令李朝斌歸宗則在王氏本生之父母。不過於三子之外又增一子而在李氏撫養之父母。竟至斬焉不祀。撫子者必抱恫於九泉。爲子者將難安於畢世。核諸古禮參以今律李朝斌應於李氏別爲一家。但後其撫育之父母而不祀其以上之祖宗。於王氏則不通婚姻。一以報顧復之深恩。一以別族屬之大義。庶乎兩全之道。等語引證確切。辯論簡晰。古人有言曰。宰相須用讀書人。信哉。